

दिनांक : 19.03.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- राजस्थान दिवस रे मौके मुख्यमंत्री भजन लाल शर्मा आज विकसित ग्राम शहरी वार्ड अभियान री सरूआत कीनी।
- राज्यपाल हरिभाऊ बागडे नौजवानां ऊँ सेमीकंडक्टर अर स्टार्टअप सरीखा हलकां मांय नुवा काम अर शोध करण बाबत् कह्यो।
- राज्य रा केई हलकां मांय आंधी-बारिश-सीकर, अलवर अर कोटपूतली-बहरोड़ मांय ओळा पड्या।

अर

- आज घट स्थापना सागे चैती नौरता सरू व्ह्या।

000

चैत महीना री उजाळी एकम रे मौके आज राजस्थान दिवस हरख उमाव सागे मणायी ज्यो। ई मौके मुख्यमंत्री भजन लाल शर्मा मुख्यमंत्री भजनलाल शर्मा आज राजस्थान दिवस रे मौके जयपुर मांय 'विकसित ग्राम-शहरी वार्ड अभियान' री सरूआत कीनी। मुख्यमंत्री रा रहवास माथे राख्यी ज्या कार्यक्रम मांय वे अभियान री वेबसाइट अर वीडियो जनता ने सूप्या। वे जयपुर रा हीरापुरा बस टर्मिनल ऊँ राजस्थान रोडवेज री नुवी 207 बसां ने हरी झंडी बता र रवाना कीनी। ई सागे ई 700 महिलावां ने सड़क सुरक्षा अग्रदूत रा तौर ऊँ हेलमेट दिया ज्या। ई मौके मुख्यमंत्री कह्यो के राज्य सरकार प्रदेश मांय आसान अर सुरक्षित सफर तैय कर रही है। खबरनवीसां सागे बातचीत करता थकां उपमुख्यमंत्री अर परिवहन मंत्री डॉ. प्रेमचन्द बैरवा कह्यो के रोडवेज रा बेड़ा मांय शामिल करी ज्यी आं मोटरां ऊँ प्रदेश मांय न्यारी-न्यारी ठौड़ां बीचे जुड़ाव और बेहतर व्हेला।

.....
सवाईमाधोपुर रा छोटा राजबाग मांय आज सिंज्यां नामी लोक कलाकार उस्ताद गफूर खान वां रा भीडूआं सागे सांस्कृतिक कार्यक्रम पेश कर रह्या है। पाली मांय जिला प्रशासन अर शिक्षा विभाग री ओर ऊँ आज 100 स्कूली विद्यार्थियां ने आऊवा रो '1857 स्वतंत्रता संग्राम पैनोरमा' बतायी ज्यो। ई दौरान बच्च्यां ने आजादी री लड़ाई मांय भाग लेवण वाळा ठाकुर कुशाल सिंह चम्पावत अर 1857 री क्रांति रा इतिहास री जाणकारी दीरीजी। भीलवाड़ा मांय उद्योग विभाग री ओर ऊँ एमएसएमई कार्यशाला राख्यी ज्यी, जिण मांय कपड़ा कारोबारियां ने ई हलका ऊँ जुड़ी केंद्र अर राज्य सरकार री योजनावां रा बारा मांय बतायी ज्यो। जयपुर मांय अल्बर्ट हॉल सामी सांस्कृतिक संध्या राख्यी जा रही है। इण मांय राज्यपाल हरिभाऊ बागडे, मुख्यमंत्री भजनलाल शर्मा अर उपमुख्यमंत्री दीया कुमारी रो ई शामिल व्हेवण रो कार्यक्रम है। ई कार्यक्रम मांय 100 ऊँ बत्ता लोक कलाकार घूमर, काळबेलिया, कच्छी घोड़ी, भवई अर गेर नाच समेत न्यारी-न्यारी प्रस्तुतियां दी जावेला।

000

राज्यपाल हरिभाऊ बागडे तकनीक ने बुद्धिमानी ऊं काम लेवण माथे ज़ोर दीनो है। वे आज जोधपुर मांय एम.बी.एम. विश्वविद्यालय रा दीक्षांत समारोह मांय बोल रह्या हा। वे नौजवानां ऊँ सेमीकंडक्टर, अंतरिक्ष अनुसंधान अर स्टार्टअप सरीखा हलका मांय नवाचार अर शोध ने बधावो देवण सारु कह्यो। श्री बागडे तकनीकी शिक्षा ने देश बणावण री प्रयोगशाला बताता थकां कह्यो के अर्जित ज्ञान रो मकसद समाज रो भलो व्हेवणो चाहिजे। राज्यपाल विकास सागे पर्यावरण संतुलन री जरूरत जताता

थकां खेजड़ी सरीखा रूखड़ा ने बचावण माथे जोर दीनो। वे विश्वविद्यालय कानी ऊँ डोली गांव ने गोद लेवण अर विद्यार्थियां कानी ऊँ कर्या जा रह्या सामाजिक कामां री सराहवणा कीनी। जळसा मांय 645 विद्यार्थियां ने उपाधियां अर 15 विद्यार्थियां ने सोना रा तमगा दे र नवाजी ज्या।

000

रक्षा मंत्री राजनाथ सिंह कह्यो है सूक्ष्म, लघु अर मध्यम उद्यम-एमएसएमई देश रा रक्षा विनिर्माण हलका रा खास हिस्सा रा तौर ऊँ सामी आ रह्या है। वे नई दिल्ली मांय राख्यी ज्या राष्ट्रीय रक्षा उद्योग सम्मेलन मांय बोल रह्या हा। रक्षा मंत्री कह्यो के स्थानीय कारोबारी अर स्टार्टअप भारत रा तकनीकी बूता ने बधावण अर देश री माली व्यवस्था ने मजबूत बणावण मांय खास काम कर रह्या है।

000

राष्ट्रपति द्रौपदी मुर्मू कह्यो है के देश सामाजिक, माली, सियासी अर सांस्कृतिक मोर्चा माथे नुवा दौर ऊँ गुजर रह्यो है अर अयोध्या रो राम जन्मभूमि मंदिर इण री निशाणी है। वे अयोध्या मांय राख्यी ज्यी सभा मांय बोल रही ही। श्रीमती मुर्मू कह्यो के सगळा समावेशी समाज अर विकसित देश बणावण री दिशा मांय आगे चाल रह्या है।

000

जयपुर रा विकास अध्ययन संस्थान मांय जीएसटी सुधारां अर वां रा सामाजिक-माली असर रा बारा मांय दो दिन री राष्ट्रीय संगोष्ठी राख्यी जा रही है। भारतीय सामाजिक विज्ञान अनुसंधान परिषद, नई दिल्ली अर राजस्थान सरकार री मदद ऊँ व्हे रही संगोष्ठी मांय विनिर्माण, खेती-बाड़ी अर सेवा हलका माथे जीएसटी रा असर रा बारा मांय चर्चा करी जा रही है। कार्यक्रम मांय भाग ले रह्या प्रोफेसर सच्चिदानंद मुखर्जी बतायो के संगोष्ठी मांय जीएसटी टू प्वाइंट ओ (2.0) रा बारा मांय खास चर्चा करी ज्यी।

000

प्रदेश रा केई हलकां मांय आज ई आंधी-बारिश सागे कठे-कठे ओळा पड्या। केई ठौड़ां आज लगातार दूजा दिन बिरखा व्ही। सीकर, अलवर अर कोटपूतली-बहरोड़ मांय तेज बारिश सागे ओळा पड्या। सिरोही मांय आखा दिन बादळा मण्ड्या रह्या अर हल्की बारिश व्ही। पाली मांय सीळो बायरो बाजण सागे हल्की बरसात व्ही। झुंझुनू मांय दोपहरां पाछे तेज हवा सागे बारिश व्ही। हनुमानगढ जिला मांय रूक-रूक र बिरखा चालती रही। बरसात ऊँ खेत-खलिहान मांय राख्योड़ी कटी फसल ने नुकसाण व्हेवण री शंका है। बिरखा ऊँ केई जिलां मांय पारो सामान्य ऊँ 3 ऊँ पांच डिग्री सेल्सियस कम दर्ज कर्यो जा रह्यो है। मौसम विभाग आज जोधपुर, बीकानेर, अजमेर, जयपुर, भरतपुर, उदयपुर अर कोटा संभाग रा कुछ हलकां मांय आंधी चालण अर बादळां री गाज सागे बारिश रा आसार जताया है। ई दौरान कठे-कठे ओळा पडबा सारू ई चेतायी ज्यो है। मौसम केंद्र जयपुर काल ई अजमेर, जयपुर, भरतपुर अर कोटा संभाग रा कुछ हलकां मांय बादळां री गाज सागे बारिश व्हेवण रा आसार जताया है।

000

प्रदेश मांय आज घट स्थापना सागे चैती नौरता सरू व्हे ग्या। ई मौके राजधानी जयपुर कने आमेर रा शिला माता मंदिर मांय वैदिक मंत्रोच्चार सागे घट स्थापना करी ज्यी। ई पाछे मोटी तादाद मांय जातरू माता रा दर्शन कर र सुख-समृद्धि री कामना कीनी। सिरोही जिला मांय ई मंदिरां अर घरां मांय विधि-विधान सागे घट स्थापना करी ज्यी। भरतपुर रा देवी मंदिरां मांय संवारे ऊँ ई मोटी तादाद मांय जातरू पूगण लाग्या। बयाना मांय झील का बाड़ा रा कैला देवी मन्दिर मांय दर्शन सारू राजस्थान समेत उत्तरप्रदेश, मध्यप्रदेश, हरियाणा अर दिल्ली ऊँ मोटी तादाद मांय जातरू पूग रह्या है। म्हाणा सवाईमाधोपुर खबरनवीस बतायो के चौथ माता मन्दिर मांय ई नौरता रो खास उमाव निजर आ रह्यो है।

000

डीग जिला मांय पाणत, सड़क अर बुनियादी ढांचा रा विकास सारू न्यारी-न्यारी परियोजनावां मंजूर करी ज्यी है। जिला रा प्रभारी जल संसाधन मंत्री सुरेश सिंह रावत आज डीग पंचायत समिति मांय खबरनवीसां सागे बातचीत करता थकां आ जाणकारी दीनी। वे बतायो के यमुना जल समझौता रा तैत नहरां रा सुधार सारू 67 करोड़ 36 लाख रुपया खर्च कर्या जावेला। मंत्री कहयो के जिला मांय धार्मिक पर्यटन ने बधावो देवण सारू हेरिटेज वॉक-वे बणायो जावेला। श्री रावत बतायो के डीग मांय जलमहल रा तळावां ने और बेहतर बणावण सारू 20 करोड़ रुपया री रकम राख्यी ज्यी है।

000

चूरू मांय आज चूरू महोत्सव सरू व्हयो। दो दिन रा ई महोत्सव री सरूआत शहर मांय गाजा-बाजा सागे शोभायात्रा सागे व्ही, जिण मांय ऊंटं अर घोड़ां री सवारी माथे सगळां रो खास ध्यान रह्यो। शोभायात्रा मांय मोटी तादाद मांय जनता शामिल व्ही। चूरू रा विधायक हरलाल सहारण बतायो के महोत्सव मांय भांत-भांत रा सांस्कृतिक कार्यक्रम अर पारंपरिक होड़ा राख्यी जा रही है।

000